



Gia avant 100 onns vegniva producì en la Georgia chaschiel tenor metoda e receptura svizra. Il comunissem ha lura però fatg ina fin a quella «tradiziun».

FOTO MAD

# Magnuccas e know-how grischun en Georgia

In l'idea dad iniziants da la Georgia dad introducì ina scolaziun agricola tenor standard svizzer è sin buna via. Sustegn survegn il project er dal Grischun – dal Plantahof. Ma atgnamain devi en il pajais dal Caucasus avant 100 onns gia ina «tradiziun» da chaschiel svizzer.

CURDIN FLIRI/RTR

Igl era in project ambizius cun qual l'investur ed anteriur minister d'agricultura *Miho Svimonishvili* ha contactà avant quatter onns il Plantahof. El vuleva fundar ina scola d'agricultura en Georgia, tenor il spiert e model da la scolaziun svizra. E sia dumonda è fruntada sin in bun resun: dus anteriur magisters dal Plantahof ed in anteriur veterinari chantunal han acceptà la sfida. *Curdin Foppa*, *Carl Brandenburger* e *Rolf Hanimann* han dapi lura investì numerusas uras cun sviluppar in model da scolaziun, cun cussegliar l'investur davart la cumpra dal terrain e cun la construcziun dals stabiliments. Els trais èn era ids diversas giadas en la Georgia per accompagnar il project.

L'emprim punct culminant è stà il november 2021, cura che 11 scolaras e scolars da la Georgia han cumenzà lur scolaziun agricola da 2 onns.

## Far chaschiel è ina cultura da lavur

Las scolaras ed ils scolars da la scola na survegnan betg mo ina scolaziun d'agricultura. Era la producziun da chaschiel svizzer fa part da la scolaziun. Perquai è vegnì fabricà era ina nova chascharia sin l'areal da la scola. In signun grischun producescha en quella dapi in

onn chaschiel da muntogna, sa chapescha tenor receptura svizra. L'investur *Miho Svimonishvili* è persvas: «Il chaschiel svizzer, quel è era collià cun ina cultura da lavur: lavurar bler e schuber, e mintgadi èsi da tgirar mintga magnucca. Quella cultura da lavur na porta betg mo bun chaschiel! Mabain ella gida era a sviluppar noss'atgna cultura da lavur e nosa productivitat.»

## In «dèjà-vu» istoric

I n'è dentant betg l'emprima giada ch'ì dat chaschiel svizzer «made in Georgia». Durant il temp zaristic eran emigradas bleras famiglias en il Caucasus. E quell'avevan cumenzà da producir chaschiel tenor l'exempel en patria. Da l'onn 1910 devi en Georgia 55 chascharias – 33 da quell'avevan en mauns svizzers. Però il sistem communistic da l'Unìun sovietica ha – cun collectivar tut il possess – fatg ina fin a quella «tradiziun» e l'istorgia dal chaschiel svizzer en Georgia fiss bunamain ida en emblidanza.

## Scola cun internat, chascharia e stalla

Sche la nova scola agricola duess purtar il pled «Swiss» en il num, sto l'entira purschida era correspunder ad in tschert standard. Ins ha perquai costruì ina sort mini-«Plantahof» a

Sarkineti, radund trais uras viadi davent da la chapitala Tiflis. Igl è ussa ina scola cun internat cun piazza per fin 30 scolars, ina stalla cun piazza per 50 vatgas da latg ed ina chascharia moderna per elavurar il latg. Latiers tutgan anc 100 hectaras terren: prada, pastgiras e champs per cultivar tartuffels ed autras culturas. Stalla e chascharia vegnan manadas dad in signun ed in pur svizzer ch'èn emigrads en Georgia. Ils scolars pon uschia lavurar ed emprender sut kundiziuns optimalas.

Tscherts cumpromiss han ins tuttina stuì far per realisar quai. Fabricar la stalla tenor prescripziuns svizzas n'era strusch pussaivel ed era il model da scolaziun han ins adattà per absolver quella entaifer dus onns.

La scolaziun duess però pussibilitar a giuven purs e puras da la Georgia da pudair manar suenter lur agen manaschi en ina grondezza economica e rentabla.



L'emissiu Telesguard dad RTR ha mussà davart la nova scola agricola en la Georgia. Quella è da vesair cun quest code-QR.



Instrucziun en la stalla en Georgia – cun muvel brin e chapitschas da «Braunvieh».

FOTO CURDIN FLIRI/RTR